

Yayasan 1MDB Sumbang RM2 Juta Untuk Anugerah Masjid Malaysia 2014
Bernama
20 Mac, 2014

PUTRAJAYA, 20 Mac (Bernama) -- Yayasan 1Malaysia Development Berhad (1MDB) menyumbang RM2 juta kepada Jabatan Kemajuan Islam Malaysia (Jakim) untuk penganjuran Anugerah Masjid Malaysia (AMM) peringkat kebangsaan 2014.

Ketua Pengarah Jakim Datuk Othman Mustapha berkata sumbangan itu akan digunakan untuk proses pengauditan masjid-masjid yang dicalonkan, majlis penganugerahan itu serta kos untuk pemenang anugerah.

"Jakim amat berbesar hati atas sumbangan ini yang merupakan satu bentuk keprihatinan yang tinggi oleh Yayasan 1MDB untuk melihat masjid-masjid di Malaysia terus berkembang maju dan tersohor," katanya dalam satu kenyataan.

Sumbangan itu disampaikan Pengarah Program Tanggungjawab Sosial Korporat Yayasan 1MDB Datuk Dr Shamsul Anwar Sulaiman kepada Othman dalam satu majlis di sini hari ini.

Othman berkata pelaksanaan AMM 2014 hasil cetusan idea Perdana Menteri Datuk Seri Najib Tun Razak dalam ucapannya pada Majlis Perhimpunan Perdana Ulama,Umara dan Asnaf di Stadium Putra Bukit Jalil pada 5 Mac 2013.

AMM 2014 akan dilaksanakan Jakim, sekretariat Ulama-Umara dan Yayasan 1MDB dengan kerjasama Majlis Agama Islam Negeri dan Jabatan Agama Islam Negeri, katanya.

"Anugerah ini diadakan untuk menjadikan masjid sebagai pusat komuniti setempat, pusat penyatuan serta penyebaran kefahaman agama Islam dan institusi yang sesuai untuk semua lapisan masyarakat termasuk generasi muda," kata Othman.

Menurutnya empat kriteria berdasarkan Standard Penarafan Masjid Malaysia Jakim dari segi pengurusan, pengimaran, kemudahan prasarana serta persekitaran dan landskap akan dinilai untuk mencari pemenang.

Pemenang akan menerima hadiah wang tunai RM100,000 bagi kategori Masjid Daerah dan RM100,000 lagi bagi kategori Masjid Kariah.

Othman berkata AMM 2014 dijangka dirasmikan Perdana Menteri pada tarikh yang akan ditetapkan kelak, selepas selesai proses penilaian dan audit 42 masjid di seluruh negara.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1023554>